



*Jumat, 17 Juni 2022*  
**Ogen: Ende-enden Salomo 1:5**



**"Mberu"**



Semal man sekalak diberu si kataken mejile. Bagekin biakna sekalak diberu. E maka lenga pe lit ibahan gelarna tantangna tubuh adi ia diberu ikataken cantik. I bas kalak karo cantik entah pe mejile e ikataken mberu. Ayona mejile, melemuk, kulitna bersih, bukna terawat mejile. Mberu e la lit man pandangan. Singuda-nguda Jerusalem, tandaina man bana, ietehna kulitna mbiring desken kemah-kemah kedar si gelap, tapi mejile desken kire-kire istana Salomo. Kedar e gelar suku bangsa nomaden kuno, sinursur Ismael anak Abraham ras Hagar. Tuhu jenis kulitna mbiring tapi bagi nina kalak karo, 'labo kulit nentukan isi.' Daratna banci saja kurang akap jilena tapi pusuh e banci lebihen bagi berlian.

Bage me pengajuk man kerina diberu, nande si mejile. Labo kepe tatapen daratna, tapi pusuhna. Biak ras perukuren si mehuli em erbahansa lit percaya diri. Singuda-nguda Jerusalem biak si mehuli e lit i bas ia. E maka katakenna, mberu kap aku aminna pe mbiring. Labo ertina adi mbiring la mejile, tapi si erbahan mejile e e me lagu langkah. Tetap mpertahanken biak si mehuli i bas diri selaku diberu.

Uga kin biak dasar i bas diberu? Sipemena, sabar, murah senyum la gia bagi ukurna si jadi. Peduaken, ngasup ngampar bana (nguasai diri), la murah emosi, banci arih-arih labo ia nggit kal sitahanen, nggit surut gelah ula rubat. Sipeteluken, diberu mediate man sekelewet, nggit nampati bas kai si lit i bas ia. Si peempatken, mejingkat, bas erdahin sikap, dungina dahin si iendesken man bana, la mejungut bas ndahiken dahin e, i bas pusuhna nari ia erdahin, la ndarami pujin i bas kalak nari, tuhu-tuhu kal idahikenna alu ukur meriah. Diberu si mberu lalap mehuli hubungenna ras Dibata. Em erbahansa ia ngasup nuduhken biak-biak si mehuli ndai. Pendilo man kerina diberu, pekena-kena biak si mehuli, si enggo lit i bas kita. Em erbahansa kita mberu.

*Mberu, mejile desken berlian.*